



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՎԱՐՉԱՊԵՏԻ ԱՇԽԱՏԱԿԱԶՄԻ ՂԵԿԱՎԱՐ**

0010 ք. Երևան, Կառավարական տուն 1

**№ 02/05.1/14257-2026**

**ԱԶԳԱՅԻՆ ԺՈՂՈՎԻ ԱՇԽԱՏԱԿԱԶՄԻ ՂԵԿԱՎԱՐ-ԳԼԽԱՎՈՐ ՔԱՐՏՈՒՂԱՐ  
ԴԱՎԻԹ ԱՌԱՔԵԼՅԱՆԻՆ**

Հարգելի՛ պարոն Առաքելյան,

Համաձայն «Ազգային ժողովի կանոնակարգ» Հայաստանի Հանրապետության սահմանադրական օրենքի 66-րդ և 77-րդ հոդվածների՝ Ձեզ ենք ներկայացնում՝

1) «Բարձր տեխնոլոգիաների ոլորտի պետական աջակցության մասին» օրենքում փոփոխություններ և լրացումներ կատարելու մասին» և «Տեղեկատվական տեխնոլոգիաների ոլորտի պետական աջակցության մասին» օրենքն ուժը կորցրած ճանաչելու մասին» Հայաստանի Հանրապետության օրենքների նախագծերի փաթեթի (Պ-1302-01.04.2026-SՀ-011/0) վերաբերյալ Հայաստանի Հանրապետության կառավարության առաջարկությունը,

2) Հայաստանի Հանրապետության վարչապետի 2026 թվականի ապրիլի 27-ի «Հայաստանի Հանրապետության կառավարության ներկայացուցիչ (հարակից զեկուցող) նշանակելու մասին» N 357 - Ա որոշումը:

Հարգանքով՝

**ԱՐԱՅԻԿ ՀԱՐՈՒԹՅՈՒՆՅԱՆ**

Կատարող՝ Պետրոս Քաջախյան

Ազգային ժողովի հետ կապերի վարչության խորհրդական՝ կառուցվածքային ստորաբաժանումներում առանձին գործառույթներ համակարգող

Հեռ. 010515686

Էլ փոստ՝ petros.qatsakhyan@gov.am

«ԲԱՐՁՐ ՏԵԽՆՈԼՈԳԻԱՆԵՐԻ ՈԼՈՐՏԻ ՊԵՏԱԿԱՆ ԱԶԱԿՑՈՒԹՅԱՆ ՄԱՍԻՆ» ՕՐԵՆՔՈՒՄ ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ» ԵՎ «ՏԵՂԵԿԱՏՎԱԿԱՆ ՏԵԽՆՈԼՈԳԻԱՆԵՐԻ ՈԼՈՐՏԻ ՊԵՏԱԿԱՆ ԱԶԱԿՑՈՒԹՅԱՆ ՄԱՍԻՆ» ՕՐԵՆՔՆ ՈՒԺԸ ԿՈՐՑՐԱԾ ՃԱՆԱՉԵԼՈՒ ՄԱՍԻՆ» ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔՆԵՐԻ ՆԱԽԱԳԾԵՐԻ ՓԱԹԵԹԻ (Պ-1302-01.04.2026-S<-011/0) ՎԵՐԱԲԵՐՅԱԼ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ ԱՌԱՋԱՐԿՈՒԹՅՈՒՆԸ

Հայաստանի Հանրապետության կառավարությունը «Բարձր տեխնոլոգիաների ոլորտի պետական աջակցության մասին» օրենքում փոփոխություններ և լրացումներ կատարելու մասին» և «Տեղեկատվական տեխնոլոգիաների ոլորտի պետական աջակցության մասին» օրենքն ուժը կորցրած ճանաչելու մասին» Հայաստանի Հանրապետության օրենքների նախագծերի փաթեթի վերաբերյալ ստորև ներկայացնում է իր դիտարկումներն ու առաջարկությունները:

1. «Բարձր տեխնոլոգիաների ոլորտի պետական աջակցության մասին» օրենքով (այսուհետ՝ օրենք) սահմանված պետական աջակցության տրամադրման գործընթացի լավարկման կապակցությամբ մեծածավալ փոփոխություններ մշակելու և հետագայում դրանք համախմբած փոփոխությունների միասնական փաթեթով ներկայացնելու անհրաժեշտությամբ պայմանավորված՝ առաջարկում ենք այս փուլում օրենքում չկատարել նախագծով ներկայացված ծավալով փոփոխությունները:

Մասնավորապես՝ առաջարկում ենք նախագծից հանել 2-րդ հոդվածի 2-րդ, 4-րդ և 5-րդ կետերը, 5-րդ, 7-րդ, 8-րդ և 11-րդ հոդվածները՝ դրանք հետագայում համակարգային փոփոխությունների համատեքստում քննարկելու և անդրադառնալու նպատակով:

2. Նախագծի 3-րդ հոդվածի համաձայն՝ օրենքի 5-րդ հոդվածը նոր խմբագրությամբ շարադրելու կապակցությամբ հայտնում ենք հետևյալը.

1) նախատեսվում է օրենքի կարգավորումներից հանել վերապատրաստման նպատակով տրամադրվող պետական աջակցությանն առնչվող կարգավորումները: Բարձր տեխնոլոգիաների ոլորտում կրթական բաղադրիչի ներառմանն ուղղված միջոցառումների խթանման համատեքստում առաջարկում ենք վերապատրաստման մասով օրենքում փոփոխություններ չկատարել.

2) նոր խմբագրությամբ շարադրված 2-րդ մասի համաձայն՝

«2. Բարձր տեխնոլոգիաների ոլորտի կազմակերպություններին կամ անհատ ձեռնարկատերերին (այսուհետ՝ նաև տնտեսավարող սուբյեկտ), աշխատանքային միգրանտներին կամ այլ սուբյեկտներին պետական աջակցությունը տրամադրվում է սույն օրենքով:» Այսինքն՝ 2-րդ մասը լրացվում է «աշխատանքային միգրանտներին» արտահայտությամբ:

Հաշվի առնելով, որ օրենքի 3-րդ հոդվածի 1-ին մասի 7-րդ կետի համաձայն՝

պետական աջակցություն է համարվում բարձր տեխնոլոգիաների ոլորտի կազմակերպություններին կամ անհատ ձեռնարկատերերին կամ այլ սուբյեկտներին ՀՀ պետական բյուջեից նույն օրենքի 5-րդ հոդվածի 4-րդ և 5-րդ մասերի համաձայն տրամադրվող գումարը՝ առաջարկում ենք վերոնշյալ մասից հանել «, աշխատանքային միգրանտներին» բառերը.

3) նոր խմբագրությամբ շարադրվող 5-րդ մասի 2-րդ կետով սահմանվում է, որ նույն մասին համապատասխան աշխատանքային միգրանտին տրամադրվող պետական աջակցության գումարների մասով գործատու հանդիսացող տնտեսավարող սուբյեկտի, ինչպես նաև վարձու աշխատող աշխատանքային միգրանտի համար հարկային պարտավորություն չի առաջանում: Վերոնշյալի առնչությամբ հայտնում ենք, որ հարկային պարտավորությունների առաջացման հետ կապված հարցերը կարգավորվում են ՀՀ հարկային օրենսգրքով, ուստի առաջարկում ենք նախագծի 3-րդ հոդվածով փոփոխվող օրենքի 5-րդ հոդվածի 5-րդ մասի 2-րդ կետի 2-րդ նախադասությունը փոխարինել ՀՀ հարկային օրենսգրքի 147-րդ հոդվածի 1-ին մասի 15-րդ կետի վերջին նախադասության ձևակերպմամբ, հետևյալ բովանդակությամբ՝

«2) տնտեսավարող սուբյեկտը պետական աջակցության գումարը ստանալուց հետո հինգ աշխատանքային օրվա ընթացքում այն փոխանցում է աշխատանքային միգրանտին՝ որպես լիազոր մարմնի կողմից աշխատանքային միգրանտի համար (օգտին) կատարվող վճարում:».

4) նոր խմբագրությամբ շարադրվող 4-րդ և 5-րդ մասերի համաձայն՝ պետական աջակցությունը տրամադրվում է տվյալ աշխատողի համար հաշվարկված և հարկային մարմին ներկայացված եկամտային հարկի գումարի նկատմամբ 60 տոկոսի հաշվարկմամբ: Այսինքն՝ առաջարկվում է փոխել պետական աջակցության գումարի հաշվարկման բազան՝ սահմանելով, որ պետական աջակցության գումարի չափը հաշվարկվում է վարձու աշխատողի բոլոր եկամուտների մասով հաշվարկված եկամտային հարկի գումարի նկատմամբ: Հարկ է նկատել, որ գործող օրենսդրությամբ հաշվարկը կատարվում է՝ հիմք ընդունելով աշխատողի աշխատավարձի և դրան հավասարեցված այլ վճարումների կամ քաղաքացիական իրավական պայմանագրով աշխատանքի վարձատրության գծով հաշվարկված եկամտային հարկի գումարը:

Նախագծի ընդունման հիմնավորման համաձայն՝ առաջարկության նպատակը, մասնավորապես, այն է, որ Պետական եկամուտների կոմիտեի տվյալների բազայում աշխատավարձի և դրան հավասարեցված այլ վճարումների համար հաշվարկված եկամտային հարկը առանձին չի հաշվառվում, ինչով պայմանավորված՝ առաջանում են դժվարություններ հարթակի կողմից Պետական եկամուտների կոմիտեի տվյալների շտեմարանից հարցումներ կատարելիս:

Վերոգրյալի կապակցությամբ նախ հայտնում ենք, որ ներկայացված հիմնավորումից պարզ չէ խնդրի բովանդակությունը, քանի որ աշխատավարձի և դրան հավասարեցված այլ վճարումների, ինչպես նաև քաղաքացիական իրավական պայմանագրով աշխատանքի վարձատրության մասով հարկային գործակալների կողմից հարկային մարմին է ներկայացվում անձնավորված տեղեկատվություն:

Բացի այդ, առաջարկությունը նշանակում է, որ օրինակ՝ ֆիզիկական անձի կողմից իր գործատուին վարձակալությամբ գույք հանձնելու դեպքում այդ վարձակալության

գումարների մասով հաշվարկված եկամտային հարկը նույնպես հանդիսանալու է պետական աջակցության չափի հաշվարկման հիմք, ինչը խնդրահարույց է: Ընդ որում՝ հարկ է նկատել, որ վարձակալական վճարների մասով հաշվարկված եկամտային հարկի գումարի մասով անձնավորված տեղեկատվություն հարկային մարմին ներկայացվում է տարեկան՝ մինչև հաշվետու հարկային տարվան հաջորդող հարկային տարվա մարտի 1-ը ներառյալ, ինչը նշանակում է, որ յուրաքանչյուր եռամսյակ աջակցության չափը որոշելը հնարավոր չի լինելու:

Հաշվի առնելով բարձր տեխնոլոգիաների ոլորտի առաջնահերթությունները և ՀՀ-ում գիտահետազոտական և փորձարարական մշակումների (R&D) աշխատանքների զարգացումը՝ առաջարկում ենք օրենքի 5-րդ հոդվածում նախատեսել, որ՝

«Օրենքով սահմանված պետական աջակցության տրամադրման ժամանակ Հայաստանի Հանրապետության հարկային օրենսգրքի 150-րդ հոդվածի 1.1-ին մասով հարկային արտոնությունից օգտվող վարձու աշխատողների մասով աջակցության չափի հաշվարկման հիմքում աշխատավարձի և դրան հավասարեցված այլ վճարումների գծով հաշվետու ժամանակաշրջանում հաշվարկված եկամտային հարկի գումարի փոխարեն կիրառվում է նույն ժամանակաշրջանի աշխատավարձի և դրան հավասարեցված այլ վճարումների 20 տոկոսին համարժեք մեծությունը:»:

Միաժամանակ, տարընկալումից խուսափելու նպատակով, առաջարկում ենք նոր խմբագրությամբ շարադրվող 6-րդ մասը շարադրել հետևյալ ձևակերպմամբ՝

«6. Սույն հոդվածով սահմանված պետական աջակցության տրամադրման համար հիմք հանդիսացող աշխատավարձի և դրան հավասարեցված այլ վճարումների հաշվարկման, փոփոխության, ինչպես նաև աշխատանքային միգրանտին պետական աջակցության գումարները չփոխանցելու ռիսկը կրում է տնտեսավարող սուբյեկտը:»:

5) նոր խմբագրությամբ շարադրվող 7-րդ մասի համաձայն՝

«7. Պետական աջակցություն ստացած նոր աշխատողի կամ աշխատանքային միգրանտի համար հաշվարկված եկամտային հարկի չափի փոփոխման դեպքում ավել վճարված գումարը տնտեսավարող սուբյեկտի կողմից ենթակա է վերադարձման Հայաստանի Հանրապետության պետական բյուջե, բացառությամբ այն դեպքի, երբ աշխատանքային միգրանտին ավել վճարված պետական աջակցության գումարի հաշվարկման հիմքում ի հայտ եկած հանգամանքը պայմանավորված է լիազոր մարմնի կողմից պետական աջակցության գումարի չափի սխալ հաշվարկմամբ:»:

Միաժամանակ նախագծի ընդունման հիմնավորման 1-ին կետում վերոնշյալ դրույթի անհրաժեշտությանն անդրադարձ չկա: Միայն նշվել է, որ օրենքի կիրարկման ընթացքում ի հայտ եկած մի շարք խնդիրների վերացման և հստակեցման նպատակով բարելավվում է բարձր տեխնոլոգիաների ոլորտում պետական աջակցության տրամադրման գործիքակազմը:

Այս առումով հայտնում ենք, որ պարզ չէ, թե ինչ վերլուծությունների կամ դիտարկումների հիման վրա է առաջարկվել սահմանել դրույթ՝ համաձայն որի լիազոր մարմնի կողմից պետական աջակցության գումարի չափի սխալ հաշվարկման դեպքում աշխատանքային միգրանտին վճարված գումարները վերադարձման ենթակա չեն:

Հաշվի առնելով վերոգրյալը՝ առաջարկում ենք վերոնշյալ 7-րդ մասով նախատեսված կարգավորումն ամբողջությամբ հանել նախագծից՝ հաշվի առնելով հանրային

միջոցների անարդյունավետ ծախսերի բացառման սկզբունքը: Հետևաբար անհրաժեշտ կլինի հանել 8-րդ մասը ևս.

6) նոր խմբագրությամբ շարադրվող 10-րդ մասով սահմանվում է, որ նույն հոդվածի 4-րդ մասով (նոր աշխատողի մասով) սահմանված աջակցությունը տրամադրվում է հարկման ընդհանուր համակարգում և շրջանառության հարկի համակարգում գործող կազմակերպություններին և անհատ ձեռնարկատերերին՝ 2025 թվականի հունվարի 1-ից մինչև 2031 թվականի դեկտեմբերի 31-ն ընկած ժամանակահատվածի համար: Ընդ որում՝ շրջանառության հարկի համակարգում գործող կազմակերպությունը կամ անհատ ձեռնարկատերն աջակցությունից օգտվելն սկսելու օրացուցային տարվան հաջորդող երրորդ օրացուցային տարին լրանալուց հետո կարող է շարունակել օգտվել աջակցությունից, եթե գործում է հարկման ընդհանուր համակարգում: Նշվածի հետ կապված առաջարկում ենք համարժեք կարգավորումներ նախատեսել նաև նույն հոդվածի 5-րդ մասով (միգրանտի համար) սահմանված աջակցության համար:

Ելնելով նշվածից՝ առաջարկում ենք 10-րդ մասում «4-րդ մասում» բառերը փոխարինել «4-րդ և 5-րդ մասերում» բառերով: Այնուհետև հիշյալ կարգավորումը վերաբերելի կլինի նաև վերապատրաստման դեպքում պետական աջակցության տրամադրման կարգավորումներին:

3. Առաջարկում ենք նախագծի 4-րդ հոդվածով նոր խմբագրությամբ շարադրվող օրենքի 6-րդ հոդվածի 2-րդ մասից հանել վերջին նախադասությունը՝ դրանց ևս հետագայում անդրադառնալու նպատակով: Նույն հոդվածի 5-րդ մասում առաջարկում ենք «ստացողի» բառից հետո լրացնել «իսկ աշխատանքային միգրանտի դեպքում՝ միջնորդի» բառերը՝ հաշվի առնելով, որ պայմանագիրը կնքվելու է ոչ թե աշխատանքային միգրանտների հետ, այլ միջնորդ տնտեսավարող սուբյեկտի հետ՝ կարգավորելով նաև միջնորդի և լիազոր մարմնի հարաբերությունները:

4. Առաջարկում ենք նախագծից հանել 6-րդ հոդվածի 1-ին, 3-րդ և 4-րդ մասերը՝ նկատի ունենալով, որ դադարեցման հիմքերին կանդրադառնաք համակարգային փոփոխությունների ժամանակ, իսկ մյուս կետերն արդեն իսկ կարգավորված են օրենքում:

5. Առաջարկում ենք նախագծից հանել 10-րդ հոդվածի 2-րդ կետը՝ մոնիթորինգի անցկացման հարաբերությունները հետագայում կարգավորելու անհրաժեշտությամբ պայմանավորված:

6. Վերոնշյալ առաջարկությունների ներկայացման համատեքստում անհրաժեշտ է նախագծի 12-րդ հոդվածը շարադրել հետևյալ խմբագրությամբ՝

«Հոդված 12. Եզրափակիչ և անցումային դրույթներ

1. Սույն օրենքն ուժի մեջ է մտնում պաշտոնական հրապարակմանը հաջորդող օրվանից և տարածվում է 2026 թվականի հունվարի 1-ից սկսվող հաշվետու ժամանակաշրջանների վրա:

2. Սույն օրենքն ուժի մեջ մտնելուց հետո տնտեսավարող սուբյեկտը կարող է դիմել պետական աջակցության համար 2025 թվականի հունվարի 1-ից հետո բարձր տեխնոլոգիաների ոլորտ մուտք գործած նոր աշխատողի համար, եթե տվյալ նոր աշխատողի նախկին գործատու տնտեսավարող սուբյեկտն իր մասով չի ստացել պետական աջակցություն:»:

7. Առաջարկվում է փաթեթից հանել «Տեղեկատվական տեխնոլոգիաների ոլորտի

պետական աջակցության մասին» օրենքն ուժը կորցրած ճանաչելու մասին» օրենքի նախագիծը:

Ամփոփելով վերոշարադրյալը՝ Հայաստանի Հանրապետության կառավարությունն առաջարկում է օրենքների նախագծերի փաթեթը լրամշակել ներկայացված դիտարկումների և առաջարկությունների հիման վրա:



## **ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՐՉԱՊԵՏ Ո Ր Ո Շ ՈՒ Մ**

N 357- Ա

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ  
ՆԵՐԿԱՅԱՑՈՒՑԻՉ (ՀԱՐԱԿԻՑ ԶԵԿՈՒՑՈՂ)  
ՆՇԱՆԱԿԵԼՈՒ ՄԱՍԻՆ**

---

Հիմք ընդունելով «Ազգային ժողովի կանոնակարգ» սահմանադրական օրենքի 66-րդ հոդվածի 2-րդ մասը՝

Հայաստանի Հանրապետության բարձր տեխնոլոգիական արդյունաբերության նախարար Մխիթար Հայրապետյանին նշանակել Հայաստանի Հանրապետության Ազգային ժողովում «Բարձր տեխնոլոգիաների ոլորտի պետական աջակցության մասին» օրենքում փոփոխություններ և լրացումներ կատարելու մասին» և «Տեղեկատվական տեխնոլոգիաների ոլորտի պետական աջակցության մասին» օրենքների նախագծերի փաթեթը (Պ-1302-01.04.2026-ՏՀ-011/0) քննարկելիս Հայաստանի Հանրապետության կառավարության ներկայացուցիչ (հարակից զեկուցող):

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՎԱՐՉԱՊԵՏ**

**Ն. ՓԱՇԻՆՅԱՆ**

Երևան

27.04.2026  
ՀԱՎԱՍՏԱՎԱՐ Է  
ԷԼԵԿՏՐՈՆԱՑԻՆ  
ԱՏՈՐԱԳՐՈՒԹՅԱՆԲ

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՕՐԵՆՔԸ****«ԲԱՐՁՐ ՏԵԽՆՈԼՈԳԻԱՆԵՐԻ ՈԼՈՐՏԻ ՊԵՏԱԿԱՆ ԱԶԱԿՑՈՒԹՅԱՆ ՄԱՍԻՆ» ՕՐԵՆՔՈՒՄ  
ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ**

**Հոդված 1.** «Բարձր տեխնոլոգիաների ոլորտի պետական աջակցության մասին» 2024 թվականի դեկտեմբերի 17-ի ՀՕ-498-Ն օրենքի (այսուհետ՝ Օրենք) ամբողջ տեքստից հանել «կամ քաղաքացիական իրավական պայմանագրով աշխատանքի վարձատրության» բառերը:

**Հոդված 2.** Օրենքի 3-րդ հոդվածի 1-ին մասում՝

1) 4-րդ կետը շարադրել նոր խմբագրությամբ՝ հետևյալ բովանդակությամբ.

«4) վարձու աշխատող՝ աշխատանքային պայմանագրին կամ աշխատանքի ընդունման մասին անհատական իրավական ակտին համապատասխան աշխատանքներ կատարող».

2) 5-րդ կետը շարադրել նոր խմբագրությամբ՝ հետևյալ բովանդակությամբ.

«5) բարձր տեխնոլոգիաների ոլորտի կազմակերպություն կամ անհատ ձեռնարկատեր՝ Հայաստանի Հանրապետության ղեզիդենտ իրավաբանական անձ կամ անհատ ձեռնարկատեր, որի՝ ավելացված արժեքի հարկի եւ (կամ) շրջանառության հարկի հարկային հաշվարկներով հայտարարագրած գործունեության բոլոր տեսակներից իրացման շրջանառության առնվազն 90 տոկոսը տվյալ հարկատեսակի համար օրենսդրությամբ սահմանված հաշվետու ժամանակաշրջանում ձեւավորվել է բարձր տեխնոլոգիաների ոլորտի գործունեության տեսակներից: Բարձր տեխնոլոգիաների ոլորտի գործունեության տեսակների որոշման համար հիմք են ընդունվում հաշվետու ժամանակաշրջանում ներառված ամիսների եւ (կամ) եռամսյակի համար սույն կետում նշված յուրաքանչյուր հարկային հաշվարկով հայտարարագրած տնտեսական գործունեության տեսակների դասակարգիչները».

3) 10-րդ կետը շարադրել նոր խմբագրությամբ՝ հետևյալ բովանդակությամբ.

«10) նոր աշխատող՝ մասնագիտական աշխատանք կատարող այն վարձու աշխատողը, ով աշխատանքի ընդունման տարվան նախորդող չորս տարիների ընթացքում բարձր տեխնոլոգիաների ոլորտում գործունեություն իրականացնող գործատուի մոտ վարձու աշխատող չի հանդիսացել, իսկ բարձր տեխնոլոգիաների ոլորտում գործունեություն իրականացնող գործատուի մոտ աշխատանքի է ընդունվել 2024 թվականի դեկտեմբերի 31-ից հետո».

4) 11-րդ կետը շարադրել նոր խմբագրությամբ՝ հետևյալ բովանդակությամբ.

«11. հաշվետու ժամանակաշրջան՝ պետական աջակցության տրամադրման համար նախատեսված ժամանակաշրջան, որը հաշվարկվում է յուրաքանչյուր օրացուցային տարվա համար չորս եռամսյակներով՝ սկսվելով տվյալ տարվա սկզբից»

5) լրացնել նոր 12-րդ կետ՝ հետևյալ բովանդակությամբ.

«12) պետական աջակցության դադարեցում՝ սույն օրենքով սահմանված դեպքերում սուբյեկտին պետական աջակցության տրամադրման դադարեցում սույն օրենքի գործողության ողջ ընթացքում»:

**Հոդված 3.** Օրենքի 5-րդ հոդվածը շարադրել նոր խմբագրությամբ՝ հետեյալ բովանդակությամբ.

*«Հոդված 5. Բարձր տեխնոլոգիաների ոլորտի պետական աջակցության իրականացումը*

1. Բարձր տեխնոլոգիաների ոլորտի պետական աջակցության ենթակա գործունեության տեսակները՝ ըստ տնտեսական գործունեության դասակարգիչների, սահմանում է Կառավարությունը:

2. Բարձր տեխնոլոգիաների ոլորտի կազմակերպություններին կամ անհատ ձեռնարկատերերին (այսուհետ նաեւ՝ տնտեսավարող սուբյեկտ), աշխատանքային միգրանտներին կամ այլ սուբյեկտներին պետական աջակցությունը տրամադրվում է սույն օրենքով: Աջակցության այլ ուղղություններ կարող են սահմանվել Հայաստանի Հանրապետության հարկային օրենսգրքով եւ այլ օրենսդրական ակտերով:

3. Լիազոր մարմինը, հաշվի առնելով բարձր տեխնոլոգիաների ոլորտի զարգացման գերակայությունները, կարող է մշակել եւ Կառավարության հաստատմանը ներկայացնել աջակցության տրամադրման այլ կարգեր:

4. Կառավարության սահմանած պետական աջակցության ենթակա տնտեսական գործունեության դասակարգիչներով սահմանված գործունեությամբ զբաղվող տնտեսավարող սուբյեկտներին պետական աջակցությունը տրամադրվում է նոր աշխատողներ ներգրավելու համար: Ընդ որում՝

1) սույն մասով սահմանված պետական աջակցությունը տնտեսավարող սուբյեկտին տրամադրվում է նոր աշխատողի համար հաշվարկված եւ հարկային մարմինն ներկայացրած եկամտային հարկի գումարի՝ 60 տոկոսի չափով.

2) նոր աշխատողի կարգավիճակը պահպանվում է նոր աշխատողին սույն օրենքի իմաստով մասնագիտական աշխատանքի ընդունման ամսվա 1-ից սկսած՝ օրացուցային օրերով հաշվարկված երրորդ տարին լրանալու օրը ներառող ամսվա վերջին օրը ներառյալ:

5. Կառավարության սահմանած պետական աջակցության ենթակա տնտեսական գործունեության դասակարգիչներով սահմանված գործունեությամբ զբաղվող տնտեսավարող սուբյեկտների վարձու աշխատող աշխատանքային միգրանտին տրամադրվում է աջակցություն՝ իր համար հաշվարկված եւ հարկային մարմինն ներկայացված եկամտային հարկի գումարի 60 տոկոսի չափով: Ընդ որում՝

1) աշխատանքային միգրանտին պետական աջակցության տրամադրման դիմումը ներկայացնում է տնտեսավարող սուբյեկտը եւ պետական աջակցության գումարը փոխանցվում է տնտեսավարող սուբյեկտին, որպես միջնորդ՝ աշխատանքային միգրանտին փոխանցելու նպատակով:

2) տնտեսավարող սուբյեկտը պետական աջակցության գումարը ստանալուց հետո հինգ աշխատանքային օրվա ընթացքում փոխանցում է աշխատանքային միգրանտին: Այս դեպքում պետական աջակցության գումարների մասով գործառու հանդիսացող տնտեսավարող սուբյեկտի, ինչպես նաեւ վարձու աշխատող աշխատանքային միգրանտի համար հարկային պարտավորություն չի առաջանում:

6. Սույն հոդվածով սահմանված պետական աջակցության տրամադրման դեպքում տվյալ նոր աշխատողի կամ աշխատանքային միգրանտի համար հաշվարկված եկամտային հարկի հաշվարկման, փոփոխության ինչպես նաեւ աշխատանքային միգրանտին պետական աջակցության գումարները չփոխանցելու ռիսկը կրում է տնտեսավարող սուբյեկտը:

7. Պետական աջակցություն ստացած նոր աշխատողի կամ աշխատանքային միգրանտի համար հաշվարկված եկամտային հարկի չափի փոփոխման դեպքում ավել վճարված գումարը տնտեսավարող սուբյեկտի կողմից ենթակա է վերադարձման Հայաստանի Հանրապետության

պետական բյուջե, բացառությամբ այն դեպքի, երբ աշխատանքային միգրանտին ավել վճարված պետական աջակցության գումարի հաշվարկման հիմքում ի հայտ եկած հանգամանքը պայմանավորված է Լիազոր մարմնի կողմից պետական աջակցության գումարի չափի սխալ հաշվարկմամբ:

8. Սույն հոդվածի 4-րդ եւ 5-րդ մասերով սահմանված պետական աջակցության տրամադրման ժամանակ նախորդ հաշվետու ժամանակաշրջանի համար պետական աջակցության գումարի ավել վճարված գումարը ենթակա է հաշվանցման հաջորդ հաշվետու ժամանակաշրջանների մասով տրամադրման ենթակա պետական աջակցության գումարից:

9. Սույն հոդվածի 4-րդ եւ 5-րդ մասերով սահմանված պետական աջակցությունների տրամադրման կարգերը սահմանում է Կառավարությունը:

10. Սույն հոդվածի 4-րդ մասով սահմանված աջակցությունը տրամադրվում է հարկման ընդհանուր համակարգում եւ շրջանառության հարկի համակարգում գործող կազմակերպություններին եւ անհատ ձեռնարկատերերին՝ 2025 թվականի հունվարի 1-ից մինչեւ 2031 թվականի դեկտեմբերի 31-ն ընկած ժամանակահատվածի համար: Ընդ որում, շրջանառության հարկի համակարգում գործող կազմակերպությունը կամ անհատ ձեռնարկատերն աջակցությունից օգտվելն սկսելու օրացուցային տարվան հաջորդող երրորդ օրացուցային տարին լրանալուց հետո կարող է շարունակել օգտվել աջակցությունից, եթե գործում է հարկման ընդհանուր համակարգում:»:

**Հոդված 4.** Օրենքի 6-րդ հոդվածը շարադրել նոր խմբագրությամբ՝ հետեւյալ բովանդակությամբ.

*«Հոդված 6. Պետական աջակցության համար դիմող սուբյեկտներին ներկայացվող պահանջները*

1. Պետական աջակցության համար կարող են դիմել հետեւյալ սուբյեկտները.

1) Հայաստանի Հանրապետությունում պետական գրանցում ստացած առեւտրային կազմակերպությունները, այդ թվում՝ դուստր ընկերությունները, իրավաբանական անձանց մասնաճյուղերը եւ ներկայացուցչությունները.

2) Հայաստանի Հանրապետությունում հաշվառված անհատ ձեռնարկատերերը:

2. Պետական աջակցության համար դիմող տնտեսավարող սուբյեկտների, իսկ աշխատանքային միգրանտի համար դիմելու դեպքում՝ իր գործատու տնտեսավարող սուբյեկտի գործունեության իրականացման ոլորտը պետք է համապատասխանի Կառավարության սահմանած՝ պետական աջակցության ենթակա տնտեսական գործունեության դասակարգիչներով սահմանված գործունեությանը կամ ներառի այն: Ընդ որում, սույն մասով սահմանված համապատասխանությունը որոշվում է Հայաստանի Հանրապետության հարկային օրենսգրքի համաձայն ներկայացված հարկային հաշվարկներով՝ տվյալ հարկատեսակի մասով հաշվետու ժամանակաշրջանում ներկայացված հարկային յուրաքանչյուր հաշվարկով առանձին:

3. Սույն օրենքով սահմանված պահանջները բավարարող սուբյեկտները պետական աջակցությունը ստանում են կամավորության սկզբունքով՝ հարթակով դիմելու միջոցով:

4. Հարթակն ինքնաշխատ եղանակով բավարարում կամ մերժում է պետական աջակցության տրամադրումը:

5. Պետական աջակցության տրամադրման բավարարման դեպքում աջակցությունը ստացողի եւ լիազոր մարմնի միջեւ կնքվում է պայմանագիր, իսկ մերժման դեպքում հարթակով դիմողին է ներկայացվում պետական աջակցության տրամադրման մերժման մասին վարչական ակտը՝ լիազոր մարմնի գրության տեսքով:»:

### **Հոդված 5.** Օրենքի 7-րդ հոդվածի

1) 1-ին մասում լրացնել նոր 3.1-ին մաս՝ հետևյալ բովանդակությամբ.

«3.1) տնտեսավարող սուբյեկտի կողմից տվյալ հաշվետու ժամանակաշրջանում ներառված ամիսների համար Հայաստանի Հանրապետության հարկային օրենսգրքի համաձայն հարկային հաշվարկ ներկայացված չէ.».

2) 1-ին մասի 4-րդ կետում «եկամուտների գծով» բառերից հետո լրացնել «ժամկետանց» բառը:

### **Հոդված 6.** Օրենքի 8-րդ հոդվածի

1) 1-ին մասը շարադրել նոր խմբագրությամբ, հետևյալ բովանդակությամբ.

«1. Սույն օրենքի 5-րդ հոդվածով սահմանված պետական աջակցության տրամադրումը դադարեցվում է, եթե՝

1) պետական աջակցություն ստանալու համար տնտեսավարող սուբյեկտը ներկայացրել է ոչ հավաստի տեղեկություններ,

2) տնտեսավարող սուբյեկտը կատարել է այնպիսի գործողություններ, որոնց չկատարման դեպքում հնարավոր չէր լինի պետական աջակցություն ստանալը կամ պետական աջակցության գումարի չափի ավելացումը,

3) պետական աջակցության տրամադրման տվյալ հաշվետու ժամանակաշրջանի ավարտից հետո տնտեսավարող սուբյեկտը նախորդող ժամանակաշրջանների մասով գրանցման հայտերում կատարել է մասնագիտական պաշտոնների դասակարգիչների փոփոխություն, որի արդյունքում հնարավորություն է ստեղծվել պետական աջակցության ստացման կամ պետական աջակցության չափի ավելացման համար,

4) պետական աջակցության տրամադրման տվյալ հաշվետու ժամանակաշրջանի ավարտից հետո տնտեսավարող սուբյեկտը նախորդող ժամանակաշրջանների մասով հարկային հաշվարկներում կատարել է տնտեսական գործունեության տեսակի դասակարգչի փոփոխություն, որի արդյունքում հնարավորություն է ստեղծվել պետական աջակցության ստացման կամ պետական աջակցության չափի ավելացման համար:».

2) 3-րդ մասում «տնտեսավարող սուբյեկտը պարտավոր է» բառերը փոխարինել «սուբյեկտը պարտավոր է» բառերով.

3) 4-րդ մասը շարադրել նոր խմբագրությամբ՝ հետևյալ բովանդակությամբ.

«4. Տնտեսավարող սուբյեկտը գրկվում է սույն օրենքի 5-րդ հոդվածով սահմանված պետական աջակցություն ստանալու իրավունքից, եթե մեկ տարվա ընթացքում տվյալ սուբյեկտի մոտ հայտնաբերվել է դադարեցման հիմք հանդիսացող երկու եւ ավելի խախտման դեպք:»:

4) 5-րդ մասն ուժը կորցրած ճանաչել:

### **Հոդված 7.** Օրենքում լրացնել նոր՝ 8.1-ին հոդված հետևյալ բովանդակությամբ.

#### **«Հոդված 8.1. Պետական աջակցության տրամադրման բողոքարկումը**

1. Պետական աջակցության համար դիմող սուբյեկտը հարթակում կարող է բողոքարկել աջակցության պատասխանը:

2. Բողոքարկման դիմումը քննարկվում է լիազոր մարմնի կողմից՝ «Վարչարարության հիմունքների եւ վարչական վարույթի մասին մասին» օրենքով սահմանված կարգով եւ ժամկետներում:

3. Լիազոր մարմնի կողմից բողոքարկման դիմումի քննարկման ժամանակ լսումներ չեն անցկացվում: Լիազոր մարմինը ներկայացված բողոքը քննարկում է հարկային մարմնի կողմից տրամադրված տեղեկության, դիմումով ներկայացված փաստական հանգամանքների, ինչպես նաեւ լիազոր մարմնին հայտնի դարձած կամ սուբյեկտի կողմից տրամադրված այլ տեղեկատվության ուսումնասիրության հիման վրա:

4. Բողոքարկման դիմումի քննարկման արդյունքում կայացված վարչական ակտը կարող է բողոքարկվել դատական կարգով:»:

#### **Հոդված 8.** Օրենքի 9-րդ հոդվածի

1) 1-ին մասը շարադրել նոր խմբագրությամբ հետեւյալ բովանդակությամբ՝

«1. Պետական աջակցություն ստացած, պետական աջակցության համար դիմած եւ մերժված, ինչպես նաեւ սույն օրենքի 8-րդ հոդվածով սահմանված դեպքերում պետական աջակցությունը դադարեցված սուբյեկտների վերաբերյալ տեղեկատվությունը հրապարակվում է լիազոր մարմնի պաշտոնական կայքում:»:

2) 2-րդ մասն ուժը կորցրած ճանաչել:

#### **Հոդված 9.** Օրենքի 11-րդ հոդվածում լրացնել նոր 3-րդ մաս՝ հետեւյալ բովանդակությամբ.

«3. Լիազոր մարմինը բնակչության պետական ռեգիստրից անձանց վերաբերյալ տվյալներ է ստանում պետական աջակցության տրամադրման նպատակով:»

#### **Հոդված 10.** Օրենքի 13-րդ հոդվածում՝

1) 1-ին մասում «անձանց» բառը փոխարինել «սուբյեկտներին» բառերով

2) լրացնել նոր 2.1-ին եւ 2.2-րդ մասեր՝ հետեւյալ բովանդակությամբ.

«2.1. Լիազոր մարմինն իրավասու է մոնիտորինգն իրականացնել տվյալ հաշվետու ժամանակաշրջանին նախորդող երեք տարիների հաշվետու ժամանակաշրջանների կտրվածքով:

2.2. Մոնիտորինգի արդյունքում խախտումներ հայտնաբերելու դեպքում լիազոր մարմնի նախաձեռնությամբ հարուցվում է վարչական վարույթ:»:

#### **Հոդված 11.** Օրենքի 14-րդ հոդվածի

1) 1-ին մասում «2026 թվականի հունվարի 1-ից հետո հաշվարկված աշխատավարձի եւ դրան հավասարեցված այլ վճարումների կամ քաղաքացիական իրավական պայմանագրով աշխատանքի վարձատրության գծով» բառերը փոխարինել «իր գործատու տնտեսավարող սուբյեկտի կողմից 2026 թվականի հունվարի 1-ից հետո հաշվարկված եւ հարկային մարմնին ներկայացրած» բառերով.

2) 4-րդ մասի «2025 թվականի հուլիսի 1-ը» բառերը եւ թվերը փոխարինել «2026 թվականի ապրիլի 1-ը» բառերով եւ թվերով, իսկ վերջին նախադասությունն ուժը կորցրած ճանաչել:

#### **Հոդված 12.** Եզրափակիչ եւ անցումային դրույթներ

1. Սույն օրենքն ուժի մեջ է մտնում պաշտոնական հրապարակմանը հաջորդող օրվանից եւ տարածվում է 2026 թվականի հունվարի 1-ից սկսվող հաշվետու ժամանակաշրջանների վրա, բացառությամբ սույն օրենքի 7-րդ եւ 10-րդ հոդվածների, որոնց գործողությունը տարածվում է նաեւ 2025 թվականի չորրորդ եռամսյակի հաշվետու ժամանակաշրջանի վրա:
2. Մինչեւ սույն օրենքի ուժի մեջ մտնելը նոր աշխատողի կարգավիճակը պահպանվում է աշխատանքի ընդունման ամսվա 1-ից սկսած՝ օրացուցային օրերով հաշվարկված՝ երրորդ տարին լրանալու օրը ներառող ամսվա վերջին օրը ներառյալ:
3. Սույն օրենքն ուժի մեջ մտնելուց հետո Տնտեսավարող սուբյեկտը կարող է դիմել պետական աջակցության համար 2025 թվականի հունվարի 1-ից հետո բարձր տեխնոլոգիաների ոլորտ մուտք գործած նոր աշխատողի համար, եթե տվյալ նոր աշխատողի նախկին գործատու տնտեսավարող սուբյեկտը իր մասով չի ստացել պետական աջակցություն:
4. Մինչեւ սույն օրենքն ուժի մեջ մտնելը վերապաստրաստման հավաստագրերը գործում են եւ դրանով հնարավոր է աջակցություն ստանալ դրանց տրամադրման պահից 6 ամիս, բայց ոչ ավելին քան 2026 թվականի երկրորդ եռամսյակը ներառող հաշվետու ժամանակաշրջանը:
5. Սույն օրենքն ուժի մեջ մտնելուց հետո, սույն օրենքի 2-րդ հոդվածի 2-րդ եւ 4-րդ կետերով, ինչպես նաեւ սույն օրենքի 4-րդ հոդվածով նոր խմբագրությամբ շարադրվող օրենքի 6-րդ հոդվածի 2-րդ մասով սահմանված՝ հաշվետու ժամանակաշրջանին առնչվող կարգավորումները տարածվում են նաեւ մինչեւ սույն օրենքն ուժի մեջ մտնելը սկսված եւ չավարտված վարչական վարույթում քննարկվող ինչպես նաեւ Հայաստանի Հանրապետության դատական ատյաններում քննվող գործերի նկատմամբ:

ՆԱԽԱԳԻԾ

Պ-1302՝-01.04.2026-SՀ-011/0

## ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԸ

### «ՏԵՂԵԿԱՏՎԱԿԱՆ ՏԵԽՆՈԼՈԳԻԱՆԵՐԻ ՈԼՈՐՏԻ ՊԵՏԱԿԱՆ ԱԶԱԿՑՈՒԹՅԱՆ ՄԱՍԻՆ» ՕՐԵՆՔԸ ՈՒԺԸ ԿՈՐՑՐԱԾ ՃԱՆԱԶԵԼՈՒ ՄԱՍԻՆ

**Հոդված 1.** «Տեղեկատվական տեխնոլոգիաների ոլորտի պետական աջակցության մասին» 2014 թվականի դեկտեմբերի 17-ի ՀՕ-245-Ն օրենքն ուժը կորցրած ճանաչել:

**Հոդված 2.** Սույն օրենքն ուժի մեջ է մտնում պաշտոնական հրապարակմանը հաջորդող օրվանից:

ՀԻՄՆԱՎՈՐՈՒՄ

**«ԲԱՐՁՐ ՏԵԽՆՈԼՈԳԻԱՆԵՐԻ ՈԼՈՐՏԻ ՊԵՏԱԿԱՆ ԱԶԱԿՑՈՒԹՅԱՆ ՄԱՍԻՆ» ՕՐԵՆՔՈՒՄ  
ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ» ՕՐԵՆՔԻ ՆԱԽԱԳԾԻ  
ՎԵՐԱԲԵՐՅԱԼ**

**1. Իրավական ակտի անհրաժեշտությունը (նպատակը) եւ կարգավորման հարաբերությունների ներկա վիճակը եւ առկա խնդիրները:**

Նախագծի նպատակը բարձր տեխնոլոգիաների ոլորտում պետական աջակցության տրամադրման գործիքակազմի բարելավումն է եւ օրենքի կիրարկման ընթացքում ի հայտ եկած մի շարք խնդիրների վերացումը եւ հստակեցումը:

Բովանդակային առումով Նախագծով նախատեսված փոփոխությունների արդյունքում՝

1) Օրենքի կարգավորումներից հանվում է քաղաքացիական իրավական պայմանագրին համապատասխան աշխատանքներ կատարող վարձու աշխատողների համար պետական աջակցության տրամադրմանն առնչվող կարգավորումները: Այս փոփոխության նախատեսման նպատակը կայանում է նրանում, որ աջակցության տրամադրման ընթացքում քաղաքացիական իրավական պայմանագրերով աշխատանքներ կատարող վարձու աշխատողների՝ հարթակի միջոցով նույնականացումը չի ստացվում, քանի որ հարկային մարմնի ոչ անձնավորված հաշվառման տեղեկատվական բազայում այդ պայմանագրերով աշխատողների միայն թվաքանակն է ընդգրկված, եւ այս պարագայում լիազոր մարմինը ստիպված է լինում աջակցության համար դիմող տնտեսավարող սուբյեկտներից ստանալ վերջիններիս պայմանագրերը, ինչը խնդրահարույց է եւ ոչ նպատակահարմար:

Բացի այդ 2025 թվականի երեք եռամսյակների վերլուծության արդյունքում դրանց թիվը բավականին փոքր է, ինչը էական ազդեցություն չունի ոլորտի պետական աջակցության հասցեականության վրա:

2) Օրենքի կարգավորումներում աջակցության գումարի հաշվարկման գործակից համարվող աշխատավարձի եւ դրան հավասարեցված այլ վճարներումների գծով (ԱՎՈՒՄ) հաշվարկված եկամտային հարկի գումարի փոխարեն նախատեսվում է հաշվարկն իրականացնել բոլոր տեսակի վճարներից հաշվարկված եւ հարկային մարմնին ներկայացված եկամտային հարկի գումարը: Այս կարգավորման նախատեսման նպատակը կայանում է նրանում, որ ՊԵԿ տվյալների բազայում ԱՎՈՒՄ-ի համար հաշվարկված եկամտային հարկը առանձին չի հաշվառվում եւ այդ պատճառով դժվարություններ են ստեղծվում Հարթակի կողմից ՊԵԿ տվյալների շտեմարանից հարցումների կատարման ժամանակ, մասնավորապես այդ մասով հաշվարկն իրականացվում է նախարարության աշխատակիցների կողմից, այսինքն, այդ մասով՝ ստացվում է ոչ ինքնաշխատ: (Օրինակ, նշվածը վերաբերում է այն դեպքերին, որ աշխատողները բացի աշխատավարձից եւ դրանց հավասարեցված վճարներից գործատուից ստացել են նաեւ աշխատավարձ չհամարվող այլ եկամուտ, որի կապակցությամբ եւս հաշվարկվել է եկամտային հարկ, իսկ ՊԵԿ տվյալների բազայում դրանք առանձին չեն ներկայացվում, որ հնարավոր լինի ԱՅ ՓԻ-ների միջոցով ստանալ: ) Բացի դրանից, նախորդ աջակցությունների տրամադրման վերլուծությամբ պարզ է դարձել, որ դրանց տարբերությունը շատ փոքր է:

3) Օրենքի կարգավորումներից հանվում է վերապատրաստման համար տրամադրվող պետական աջակցությանն առնչվող կարգավորումները, քանի որ ըստ լիազոր մարմնի գնահատման, այն չի արդարացնում ի սկզբանե դրված նպատակը: Այնուամենայնիվ, նշվածի համատեքստում քննարկվում եւ մշակվում են ոլորտում կրթական բաղադրիչի ներառմանն ուղղված աջակցությունների հնարավոր մեխանիզմներ:

4) Նախագծում վերաշարադրվում է նոր աշխատողի հասկացությունը, ըստ որի՝ նոր աշխատողը դա մասնագիտական աշխատանք կատարող այն վարձու աշխատողն է, ով աշխատանքի ընդունման տարվան նախորդող չորս տարիների ընթացքում բարձր տեխնոլոգիաների ոլորտում

գործունեություն իրականացնող գործատուի մոտ վարձու աշխատող չի հանդիսացել, իսկ բարձր տեխնոլոգիաների ոլորտում գործունեություն իրականացնող գործատուի աշխատանքի է ընդունվել 2024 թվականի դեկտեմբերի 31-ից հետո:

Նոր աշխատողներ ներգրավելու կապակցությամբ կարգավորում է սահմանվում նաեւ նախագծի անցումային դրույթներով, ըստ որի հնարավորություն է տրվում, որ օրենքն ուժի մեջ մտնելուց հետո Տնտեսավարող սուբյեկտը կարող է դիմել պետական աջակցության համար 2025 թվականի հունվարի 1-ից հետո բարձր տեխնոլոգիաների ոլորտ մուտք գործած նոր աշխատողի համար, եթե տվյալ նոր աշխատողի նախկին գործատու տնտեսավարող սուբյեկտը իր մասով չի ստացել պետական աջակցություն:

5) Փոփոխություն է նախատեսվում նաեւ աշխատանքային միգրանտին տրամադրվող աջակցության ձեւի մեջ, մասնավորապես՝ պետական աջակցության գումարները փոխանցվում են տնտեսավարող սուբյեկտին՝ որպես միջնորդ՝ աշխատանքային միգրանտին փոխանցելու նպատակով: Ընդ որում տնտեսավարող սուբյեկտը պետական աջակցության գումարը ստանալուց հետո հինգ աշխատանքային օրվա ընթացքում պետք է փոխանցի աշխատանքային միգրանտին: Այս դեպքում պետական աջակցության գումարների մասով գործատու հանդիսացող տնտեսավարող սուբյեկտի, ինչպես նաեւ վարձու աշխատող աշխատանքային միգրանտի համար հարկային պարտավորություն չի առաջանում:

6) Նախատեսվում է, որ պետական աջակցության համար կարող են դիմել նաեւ դուստր ընկերությունները, իրավաբանական անձանց մասնաճյուղերը եւ ներկայացուցչությունները:

7) Նախատեսվում է, որ պետական աջակցության տրամադրման ժամանակ նախորդ հաշվետու ժամանակաշրջանի համար պետական աջակցության գումարի ավել վճարված գումարը ենթակա է հաշվանցման հաջորդ հաշվետու ժամանակաշրջանների մասով տրամադրման ենթակա պետական աջակցության գումարից:

Բացի այդ, Նախագծով հստակեցվում են պետական աջակցության տրամադրման մերժման եւ դադարեցման հիմքերը:

Մասնավորապես՝ պետական աջակցության մերժման հիմք է նաեւ տնտեսավարող սուբյեկտի կողմից տվյալ հաշվետու ժամանակաշրջանում ներառված ամիսների համար Հայաստանի Հանրապետության հարկային օրենսգրքի համաձայն հարկային հաշվարկ չներկայացնելը, իսկ դադարեցման հիմքերում լրացվում են հետեւյալ կարգավորումները.

- պետական աջակցություն ստանալու համար տնտեսավարող սուբյեկտը կամ աշխատանքային միգրանտը ներկայացրել են ոչ հավաստի տեղեկություններ,
- կատարել են այնպիսի գործողություններ, որոնց չկատարման դեպքում հնարավոր չէր լինի պետական աջակցություն ստանալը կամ պետական աջակցության գումարի չափի ավելացումը,
- պետական աջակցության տրամադրման տվյալ հաշվետու ժամանակաշրջանի ավարտից հետո տնտեսավարող սուբյեկտը նախորդող ժամանակաշրջանների մասով գրանցման հայտերում կատարել է մասնագիտական պաշտոնների դասակարգիչների փոփոխություն, իսկ հարկային հաշվարկներում՝ տնտեսական գործունեության տեսակի դասակարգչի փոփոխություն, որի արդյունքում հնարավորություն է ստեղծվել պետական աջակցության ստացման կամ պետական աջակցության չափի ավելացման համար:

8) Փոփոխություններ են նախատեսվում նաեւ պետական աջակցության տրամադրման մի շարք կարգավորումներում, մասնավորապես՝ հստակեցվում են պետական աջակցության տրամադրման վարչարարական ընթացակարգերը, բողոքարկումը, մոնիտորինգը եւ այլն:

9) Նախագծի Անցումային դրույթներով սահմանվում է, որ սույն օրենքն ուժի մեջ մտնելուց հետո, սույն օրենքի 2-րդ հոդվածի 2-րդ եւ 4-րդ կետերով, ինչպես նաեւ սույն օրենքի 4-րդ հոդվածով նոր խմբագրությամբ շարադրվող օրենքի 6-րդ հոդվածի 2-րդ մասով սահմանված՝ հաշվետու ժամանակաշրջանին առնչվող կարգավորումները տարածվում են նաեւ մինչեւ սույն օրենքն ուժի մեջ մտնելը սկսված եւ չավարտված վարչական վարույթում քննարկվող ինչպես նաեւ Հայաստանի Հանրապետության դատական ատյաններում քննվող գործերի նկատմամբ: Հիշյալ կարգավորման անհրաժեշտությունը կայանում է նրանում, որ գործող օրենսդրությամբ ներկայացված համանման ձեւակերպումները իրավակիրառ պրակտիկայում առաջացրել էին տարընթերցումներ եւ մեկնաբանվում էր ոչ միատեսակ, ինչը առաջ էր բերել վարչարարական քննարկումների, պարզաբանումների անհրաժեշտության, բողոքարկումների՝ ընդհուպ առկա է նաեւ դատական պրոցես: Մինչդեռ կարելի է ընդգծել, որ 2025 թվականի հունվարի 1-ից ի վեր Օրենքով սահմանված աջակցության տրամադրումն իրականացվել է Նախագծով նախատեսված հիշյալ կարգավորման տրամաբանությամբ, այսինքն Նախագծի 2-րդ հոդվածի 2-րդ եւ 4-րդ կետերով, ինչպես նաեւ Նախագծի 4-րդ հոդվածով նոր խմբագրությամբ շարադրվող օրենքի 6-րդ հոդվածի 2-րդ մասով ընդամենը հստակեցվել են գործող օրենքի հաշվետու ժամանակաշրջանին առնչվող կարգավորումները: Ինչով պայմանավորված, խնդրահարույց իրավիճակներից խուսափելու նպատակով, Նախագծով նախատեսվել է նաեւ ընդգծել, որ դրանք տարածվում են նաեւ չավարտված գործերի վրա:

10) Կատարվում են նաեւ մի շարք տեխնիկական փոփոխություններ եւ լրացումներ:

11) Հաշվի առնելով, որ 2025 թվականի մարտից սկսած այլեւ ժամկետային առումով ավարտվել են ՀՀ կառավարության մի շարք որոշումներով սահմանված ոլորտային աջակցության ծրագրերը, անհրաժեշտ է ուժը կորցրած ճանաչել նաեւ Տեղեկատվական տեխնոլոգիաների ոլորտի պետական աջակցության մասին» օրենքը: Հարկ է նկատել, որ այն դեռեւս ուժը կորցրած չի ճանաչվել քանի, որ աջակցություն նախատեսող հիշյալ որոշումների լիազորող նորմը սահմանված էր այդ օրենքով:

**2. Կարգավորման առարկան.** Նախագծի կարգավորման առարկան բարձր տեխնոլոգիական ոլորտի պետական աջակցության գործիքակազմի բարելավումն է եւ խնդրահարույց իրավիճակների բացառումը:

**3. Նախագծերի մշակման գործընթացում ներգրավված ինստիտուտները եւ անձինք.**

Նախագծերը մշակվել են ԱԺ պատգամավորների եւ ՀՀ բարձր տեխնոլոգիական արդյունաբերության նախարարության կողմից համատեղ:

**4. Իրավական ակտի կիրառման դեպքում ակնկալվող արդյունքը.** Նախագծի ընդունման արդյունքում ակնկալվում է բարձր տեխնոլոգիական ոլորտի առաջանցիկ զարգացման համար ձեւավորել առավել նպաստավոր պայմաններ: Ակնկալվում է նաեւ, որ պետական աջակցության տրամադրման ընթացակարգում կբացառվեն խնդրահարույց իրավիճակները: Աջակցության տրամադրումը կլինի առավել հասցեական: Բարձր տեխնոլոգիաների ոլորտում կխթանվեն ՀՀ քաղաքացիություն ունեցող նոր աշխատողների ներգրավումը:

**5. Առաջարկվող կարգավորման ազդեցությունը պետական բյուջեի եկամուտների եւ ծախսերի վրա.**

Սույն իրավական ակտի ընդունման արդյունքում ՀՀ պետական բյուջեի եկամուտների եւ ծախսերի վրա էական ազդեցություն չի նախատեսվում:

**6. Կապը ռազմավարական փաստաթղթերի հետ.** Հայաստանի վերափոխման ռազմավարություն 2050, Կառավարության 2021-2026 թվականների ծրագիր, ոլորտային եւ/կամ այլ ռազմավարություններ:

Նախագիծը բխում է Կառավարության 2021-2026 թվականների ծրագրի մի շարք բաժիններով սահմանված քաղաքականության ուղղություններից: Մասնավորապես՝

1) 2.3-րդ «Բարձր տեխնոլոգիաներ» բաժնով սահմանված քաղաքականության ուղղություններից, ըստ որի՝

- հաշվի առնելով բարձր տեխնոլոգիաների կարելիությունը Հայաստանի Հանրապետության տնտեսության եւ անվտանգության համար՝ Կառավարությունը շարունակելու է նպաստել նորարարական համակարգի զարգացմանը եւ տարբեր ոլորտներում համակողմանի ներդրմանը,
- բարձր տեխնոլոգիաների ոլորտում մինչեւ 2026 թվականը Կառավարությունը նախատեսում է ունենալ շուրջ 35,000 զբաղվածներ եւ ոլորտի շրջանառությունը հասցնել 500 մլրդ դրամի, որը կկազմի ՀՆԱ-ի 6-7%-ը: 2020 թվականի տվյալներով այս ցուցանիշը 4% է: Այսպիսով, Հայաստանում կստեղծվի առնվազն 16,000 նոր աշխատատեղ բարձր տեխնոլոգիաների ոլորտում,
- բարձր տեխնոլոգիաների ոլորտում Կառավարությունը նպատակադրված է իրականացնել, մասնավորապես, հետևյալ քայլերը.
- բարձր տեխնոլոգիական ոլորտում տեխնոլոգիական կրթության որակական եւ քանակական բարելավում,
- բարձր տեխնոլոգիական ընկերություններում (ստարտափներում) անհրաժեշտ ներդրումներ ներգրավելու եւ դրանց հետագա զարգացումն ու համաշխարհային շուկա ելքն ապահովելու նպատակով ֆինանսական գործիքներ ներգրավելու հնարավորությունների շարունակական մեծացում, այդ թվում՝ պետական աջակցության ծրագրերի միջոցով,
- բարձր տեխնոլոգիական ոլորտի առաջանցիկ զարգացման նպատակով տեխնոլոգիական ընկերությունների եւ բուհերի արդյունավետ համագործակցության խթանում՝ նոր մասնագետների պատրաստման եւ այլ ոլորտի մասնագետներին վերամասնագիտանալու հնարավորություն ընձեռելու միջոցով,
- ոլորտի ընկերությունների բիզնես կարողությունների զարգացմանն ուղղված ծրագրերի իրականացում,

2) 6.8-րդ «Հարկաբյուջետային քաղաքականություն» մասով սահմանված քաղաքականության ուղղություններից, ըստ որի՝

- Հարկաբյուջետային քաղաքականության հիմնական նպատակը պետական ֆինանսական համակարգի բարձր արդյունավետությունն է: Դրան հասնելու նպատակով Կառավարությունը շարունակելու է հարկային քաղաքականության այնպիսի բարեփոխումները, որոնք նպաստելու են բիզնես միջավայրի մրցունակության բարձրացմանը,
- Կառավարության կողմից իրականացվող հարկային քաղաքականությունն ուղղված է լինելու տնտեսության ներդրումային գրավչության բարձրացմանն ու տնտեսական ակտիվության մակարդակի բարելավմանը՝ դրանով իսկ ստեղծելով կայուն նախադրյալներ արտահանման եւ երկարաժամկետ տնտեսական աճի, հանրային բարիքի վերաբաշխման եւ հարկաբյուջետային կայունության ամրապնդման համար: